

27. juni 2018

EM2018/133

Inatsisartut suleriaasianni § 33 naapertorlugu Inatsisartut aalajangiiffigisassaattut siunnersuut imaattoq matumuuna saqqummiuppara:

Suliffeqarfissuit immikkoortortallit, suliffeqarfissuarni piginnittut aalajangersimasumillu ingerlatsiviusut akornanni nakkutigisaasumik nussuisarnerit akiinik aalajangersaasarnerit pillugit malitassat nalilersoqqissaqqullugit inernalu UKA2019-imi agguateqqullugu Naalackersuisut peqquneqarnissaannik Inatsisartut aalajangiiffigisassaattut siunnersuut (“Transfer-pricing”). Matumani siunertarineqarpoq akileraartarnikkut pilersarutipalaalersorsinnaanerit pinngitsoortinniarlugit malitassat sukateriffigineqarsinnaanerit, taassumalu ataani ulluinnarni ingerlatsinerit ataqqineqarnissaat.

(Inatsisartuni ilaasortaq, Henrik Fleischer, Siumut)

Tungavilersuineq:

“Transfer pricing”, imatut paasillugu nioqqutissiassanik nuutitseqattaarnikkut sumiiffinni aalajangersimasuni akinik aalajangersuisarneq Nunatsinni annertusiartuaartumik oqallisigineqaraluttuinnarpoq. Isummersuutit assigiinngitsut amerlaqaat – aammami taamaassorisat aamma amerlagunaqalutik.

“Transfer pricing” tassaavoq suliffissuit imminut piginneqatigiinnikkut atareersut, piginnittut aammalu tunisassiorfiit aalajangersimasumi inissitat, nioqqutissiassanik nuutitseqattaarnerminni sumiiffik apeqqutaatillugu akinik aalajangersaasarnerminni nakkutigeqqissaakkamik akunnerminni iluanaarnissaminnik siumut aalajangersaareertarnerat. Tamanna immikkut isigalugu inerteqqutaanngilaq, kisianni sumulluunniit attuumassuteqanngitsut akinik aalajangersaasarnerattut aalajangersaasoqartartussaavoq. Naalackersuinikkut malitassatigut piunasaqaatit malinneqanngippata, iluanaarutaasussat nuunneqarsinnaapput – tamannalu isumaqarpoq, sumut qanorlu annertutigisumik akileraarutigut akiliisoqassanersoq.

Amerlasuutigut isumaqartoqartarpoq ingerlatseqatigiiffiit ilaat akileraartarnikkut aqqissuussipiluttartut Nunatsinnut akileraarutigut akiliisussaanertik killilersimaarniarlugu aqqissuussisarlutik. Kikkut tamarmi akileraartarnikkut malitassat malillugit akileraartarnissaat tamatta soqutigisaraarput – taamaattumik pissusissamisoortutut pisariaqartutullu isigaara “transfer pricing” pillugu malitassat nalilersoqqissaarneqarnissaat, malitassat ajunngillat? imaluunniit nunatsinnut akileraarnaveersaarsinnaanermut tunngasut sukateriffigineqassappat? Tamatumalu ataani ulluinnarni ingerlatsinerit ataqqineqarnissaat.

Sunaaluunniit aallartiffeqartariaqarpoq. Taamatut naliliisoqassappat Nunamut innuttaasunullu ajunnginnerpaamik kinguneqaqqullugu allannguisoqartariaqassaaq, tamannalumi anguniagaasariaqarpoq anguneqartariaqartoq.

Pisortanut aningaasaqarnikkut allaffissornikkullu kingunerisassai:

Nalilersuinissaq qulaani pineqartutut ingerlanneqassappat taava missingersorlugu pisortanut aningaasartuutaassaaq, AC ukiup affaani sulisillugu (kr. 250.000).

Namminersortutut inuussutissarsiutilinnut aningaasaqarnikkut allaffissornikkullu kingunerisassai:

Nalilersuinissaq qulaani pineqartutut ingerlanneqassappat namminersortutut inuussutissarsiutilinnut aningaasaqarnikkut allaffissornikkullu kinguneqartitsinerlunnaviangilaq – taamaallaat Naalackersuisut namminersortutut inuussutissarsiutilinnit akuullutik nalilersueqataanissaat eqqaassanngikkaanni.

innuttaasunut aningaasaqarnikkut allaffissornikkullu kingunerisassai:

Soqanngilaq.